

混亂中 Iáu 是忠誠

然後上帝講：「你帶你 ê kiáⁿ，就是你獨生 ê kiáⁿ，你所疼 ê 以撒，去 Mó-leh-iah ê 地，到我所指示你 ê 山，tī hia kā 伊獻做燒祭。」

（《全民台語聖經》創世記 22：2）

既然咱知咱是 gōa-nih-á teh 疼咱家己 ê kiáⁿ á 是孫 á，咱就 ē-tàng 想像亞伯拉罕 kah 撒拉是 án 怎 teh 珍惜 in ê 寶貝 kiáⁿ 以撒。Tī 伊 ê 老父 kah 老母真年老，已經超過 in ê 正常生育年齡真久以後，以撒有出世來實現上帝對 in 父母 ê 個人應允。亞伯拉罕 kah 撒拉一定真疼以撒。

M̄-koh，上帝突然間講：「亞伯拉罕，用牲禮 kā 我獻祭。」亞伯拉罕回答：「上帝，我會照祢 ê 要求去做。」上帝 koh 講：「Chhōa 以撒 koh 帶你殺牲 ê 刀，去 hit-ê 遠遠 ê 所在，tī hia 獻你 ê kiáⁿ。」Chit-ê 命令一定 hō̄ 亞伯拉罕 tiòh 驚 kah gāng 去，m̄-koh，伊服從，雖然伊大悲傷。當老父 kah kiáⁿ 行到指定 ê 所在，以撒看四 khō 圍，然後講：「山羊 tī tó 位？」亞伯拉罕講上帝會提供牲禮，然後進前，去 kā in kiáⁿ 縛起來。

總是，tī 最後 ê 時刻，當亞伯拉罕 giáh 起伊 ê 短刀，beh 插入去以撒 ê 心臟 ê 時，一個天使阻止伊，koh 報伊看一隻羊角纏 tī 葡萄樹枝 ê 公羊。天使講：「你已經有證明你 ê 信仰 à，你 tiòh 用公羊來代替做牲禮。」

Chit-ê 試探超越咱所 bat 經驗過 ê 任何 tãi-chì。亞伯拉罕對上帝 hiah-nih

敬虔，koh hiah-nih 相信上主 ê 無所不能、無所不知 kah 疼，所以伊服從。伊認為上帝 hiah-nih 有智慧，所以，不管上主 ê 命令是啥物，lóng 是正確 ê，ē-tàng 放心去做，甚至伊無明白意思。

這 tòh 是咱應該盡所有 ê 努力去追求 ê 信仰，咱無一定 tiāⁿ-tiā lóng 明白為啥物 tãi-chì 會 án-ne 發生，á 是為啥物上帝會命令咱 tiòh án 怎生活，m̄-koh，咱應該有 bē 搖動 ê 信仰，相信上帝知影一切。所以，咱 tiòh 來跟 tòe 上主 ê 誠命；hiah-ê 誠命是咱 tùi 聖經，以及 tùi 耶穌基督 ê 完美模範所學習來 ê。

祈禱：上帝 ah，我 m̄ 知亞伯拉罕 kah in kiáⁿ peh 起 lih hit 座山 ê 時，伊 teh 想啥物。希伯來書講，伊認為祢 ē-tàng hō̄ 以撒 tùi 死人中 koh 活；雖然是 án-ne，伊 ê 心痛一定是極痛苦 ê。伊服從，因為伊有信仰，he 對我 kah 對亞伯拉罕來講是全款重要 ê。求祢增加我 ê 信仰，靠基督 ê 名求。阿們。

（2007.09.16）